



«A e lade, capissistu? La-de!» a si traeve vie la Tiera, vaint poiade al bancon da l'Univiers, il bar preferîr dai planets di dute le Galassie.

«Oh, daimo, Tiera - al cirive di confuartâle Mercuri - al è sucedût a ducj di vê incompressions cui siei satelits!»

«Tu tu disis cussì dome parcé che no tu ju âs - e rispuindè mareade la Tiera - tu no tu sâs tant ch'a si patìs: cheste volte la Lune a no tornarà, i lu sint! A domandarà il divorzi!»

«Sumo, sumo, no stâ a fâ une tragedie - si impaçà Uran - tu sâs in ce maniere ch'a e fate, a è cussì... lunatiche!»

«Propite chel che mi plâs di plui di jê...» e disè la Tiera cun voli inmagât.

«A funzione cussì: - al tacà Saturni cirint di menâ il discors di une altre bande - al è une vore plui facil barufâ cun chei chi vin plui dongje, cun chei chi tignin plui di cont. E al sucêt propite parcé che a nus stan plui dongje: l'orbite da lis nestrìs debilecis a jentre facilmentri in colision cun lis debilecis di chei altris e...»

«E a fâs mâl!» e sunsurà la Tiera.

«Sì, bon, ma tu no tu âs di butâti jù, cumò! - al cirì di intervegnî Venere cun dolçôr - L'Amôr al è fat cussì: al è la fuarce ch'e governe l'Univiers!»

«Aaah no stâ a tabaiâmi dal Amôr - e berlâ la Tiera - l'Amôr al covente dome a semplificâ lis rimis dai poets, par gnò cont!»

Nissun di chei altris planets al olsà plui dî cic; par cumò e lave cussì. A coventave cualchi

ere gjeologjiche, ma ancje la Tiere e varès tacât a crodi al Amôr.

***di Jacum Trevisan***